

INUIT ATAQATIGIIT

Inatsisartuni



UKA 2018/120
2. april 2019
Sofia Geisler

Inissianik attartortitsisarneq pillugu Inatsisartut peqqussutaata § 60-ip allannguutissaanik kingusinnerpaamik UKA 19-mi saqqumiusseqqullugit Naalakkersuisut peqquneqarnissaanik inatsisartut aalajaangiiffigisassaattut siunnersuugut. Taamaalilluni attartortup toqukkut qimagunnerani utoqqat illuanulluunniit nuunnerani inoqutiginni najugaqartut inigisaminnik anisneqarsinnaanerannik pitsaannerusumik illersorneqarsinnaasunngorlugit. Uani ilanngullugu § 60, imm. 2, uniffiup appaa peerneqassasoq, taamaalilluni aamma § 60, imm. 1 aamma 2 allanngortinneqassasut ukiut marluk najugaqarnissamik piunasaqaataasup qaammatinut arfinilinnut allanngortinneratigut.

(Inatsisartunut ilaasortaq Peter Olsen, Inuit Ataqatigiit)

Peter Olsen, aalajangiiffigisassatut siunnersuuteqanernut qujanaq.

Ineqarneq kikkunnut tamanut pisinnaatitaaffiussaaq. Ineqarneq angerlarsimaffeqarnerlu inunnut tamanut tunngaviulluinnarpoq. Aamma pingaaruteqarpoq attartornermut tunngatillugu attartortut toqqissisimanermik misigisimanissaat. Tamanna isumaqatigiissutigisinnaagunavipparput.

Inissiani attartortittakkani najugaqartutut allassimasoq assigiinngitsut pissutigalugit iniminiikkunnaartariaqalerpat sivikinnerpaamik ukiut marluk najugaqarfimmi pineqartumi allassimasup inissiamik attartortutut ingerlatsiinnarsinnaanerata sivikillineqarnissaa isumaqatigivarput.

Taamaattariaqarpoq. Apeqqut pillugu naleqqussaaneq inissaminiippoq, inuunitsinni qanorluunniit pisoqarsinnaanera piareersimaffigisariaqartaratsigu, tamannalu ullutsinni nunatsinni ineqariaatsip taamatut inissisimanerata eqaannerusumik aaqqiiffigineqarnissaanut pisussaaffiliivoq.

Uisup nuliaasulluunniit saniatigut, ernerup paniusulluunniit angerlarsimaffimmi najugaqartup, attartortutut allassimasup toqukkut qimagunnerani utoqqaalluunniit angerlarsimaffiinut nuuttariaqalersillugu inissiamik attartutut nangitsisinnaanerata pillugu Peter Olsenip siunnersuutaa tamakkiisumik taperserlugu Inuit Ataqatigiinniit matumuuna oqaatigissavarput, ataatsimiititaliamullu attuumassuteqartumut ingerlateqqinneqarnissaa innersuussutigissallutigut.